

Den presencia di Federacionnan Deportivo y lidernan di deporte

Presentacion Nicole Hoevertsz pa Comité Olímpico Dominicano



ORANJESTAD- Durante e fin di siman cu ta tras di lomba, Secretaria General di Comité Olímpico Arubano, Nicole Hoevertsz a wordo invita pa Comité Olímpico Dominicano pa duna presentacionnan tocante e tema Hende muher y Deporte. Durante un Asamblea General Extraordinario, den presencia di tur e Federacionnan Deportivo di e pais Caribense, Nicole a splica tocante e maneho cu ta wordo hiba na nivel internacional pa trata di involucra mas y mas hende muher den tur nivel di deporte. E invitacion na Nicole Hoevertsz, recientemente nombra tambe como miembro di Comité Olímpico Internacional, a sali for di e Comision Hende Muher y Deporte di Comité Olímpico Dominicano. Den cuadro di e Dia Internacional di Hende Muher, e Comision aki a organisa un seminario tocante e tema aki, pa cua a conta cu presencia di

dama y cabayeronan di e mundo deportivo Dominicano. Presidente di COD, Luis Mejía Oviedo y varios miembro di su Comité Ejecutivo a duna acto di presencia, apoyando asina e actividad. Presidente Mejía a expresa cu nan tabata sinti nan mes sumamente honra cu presencia di Nicole Hoevertsz, un persona cu durante e Weganan Panamericano 2003 a hunga un rol activo den organisacion di e evento continental aki. Pa e dia di Diasabra Comité Olímpico Dominicano a organisa e “Segundo Encuentro de Comités Ejecutivos Federativos”, un encuentro cu e directivanan completo di tur e federacionnan deportivo, pa trata temanan di importancia pa nan organisacion. Asina a papia tocante e programanan di Olympic Solidarity y e beneficio cu esakinan a nifica pa deporte di e pais; un analisis di e recien teni Weganan Nacional; e Ley



di Deporte y su funcionamiento den practica; temanan huridico cu ta di relevancia actual pa e federacionnan; y tambe e preparacion pa e Weganan Centro Americano y del Caribe di Cartagena 2006. Republica Dominicana lo participa na e Weganan regional aki cu un

delegacion di no menos cu 749 persona! Como invitado special pa e Encuentro, Nicole Hoevertsz a duna un presentacion na e representantenan di e diferente federacionnan deportivo, comisionnan di COD y tambe representantenan di e entidad-

nan deportivo gubernamental tocante e tema hende muher y deporte, cu a wordo ricibi cu gran entusiasmo. Basa riba e reaccionnan for di e publico presente y e diferente preguntanan cu a surgi, por conclui cu e tema ta uno cu sigur ta actual y cu ta requeri un enfoque particular na Republica Dominicana. Nicole ta wordo invita regularmente pa duna presentacionnan tocante e tema aki, pero esaki tabata pa prome biaha cu ela duna un presentacion pa un publico cu tabata consisti pa un gran mayoria di hende homber! Riba e portretnan cu ta acompaña e articulo aki por mira e participantenan na e “Se-

gundo Encuentro de Comités Olímpicos Federativos” y e mesa di honor pa e encuentro, consistiendo di miembronan di Directiva di Comité Olímpico Dominicano y tambe e representante di e Instituto gubernamental di deporte, SEDEFIR.